



RegionalCooperationCouncil

**GOVOR GENERALNOG SEKRETARA VIJEĆA ZA REGIONALNU
SARADNJU (RCC),**

GDIN. HIDE BIŠČEVIĆA

**NA GODIŠNJEM SASTANKU VIJEĆA ZA REGIONALNU SARADNJU
28. JUNA/LIPNJA 2011. GODINE, U BEČIĆIMA**

Ekselencije,

Uvaženi učesnici,

Dame i gospodo,

Zaista mi je čast obratiti se svima Vama ovdje, u Bečićima, povodom trećeg Godišnjeg sastanka Vijeća za regionalnu saradnju (RCC). Zajedno sa još jednim našim domaćinom, Republikom Crnom Gorom – kao predsjedavajućom Procesu saradnje u Jugoistočnoj Evropi (SEECF) – zadovoljstvo nam je da Vam poželimo dobrodošlicu u ovom prelijepom mjestu na crnogorskoj obali.

Dozvolite mi da današnju diskusiju otvorim tako što ću reći da su svi događaji u Jugoistočnoj Evropi i regionalnoj saradnji u cjelini pokazali ohrabrujuće znake. Sadašnji nivo regionalne saradnje u Jugoistočnoj Evropi odraz je novog duha pomirenja, umjerenosti i pragmatizma. Nova klima u regionu – prevedena u sveobuhvatan, kontinuiran i širok proces sveuključujuće saradnje svih relevantnih učesnika, od političkih čelnika, parlamenata do medija i civilnog društva, od poslovnih zajednica do međunarodnih prijatelja i partnera – je preovladala.

Konsolidacija mira i održiv razvoj u Jugoistočnoj Evropi kao i napredak ka integraciji našeg dijela Evrope u evropske i evro-atlantske institucije je od naročitog značaja imajući u vidu nedavne događaje u drugim regionima svijeta, a

naročito na Bliskom Istoku i u Sjevernoj Africi, i nove izazove i prijetnje globalnoj i evropskoj stabilnosti i sigurnosti.

U trećoj godini svog rada, RCC je pokazao da je izuzetno koristan okvir za saradnju u okruženju u kome su još uvijek prisutni brojni izazovi, poteškoće i oscilacije.

Uprkos određenim zastoјima, zemlje iz regiona su preuzele teške i ambiciozne reforme kako bi se pripremile za evropske integracije i kako bi postigle maksimalan napredak na evropskom i evro-atlantskom putu. Postignuti napredak je najvažniji pokazatelj promjena koje se dešavaju u regionu Jugoistočne Evrope.

Ovaj impuls bi trebalo zadržati i njegovati.

Finalizacija pristupnih pregovora EU za Hrvatsku imat će veoma pozitivan uticaj na druge zemlje proširenja. Zaista vjerujem da će ovi pozitivni trendovi omogućiti evropskim institucijama da, u skladu sa evropskom perspektivom koja je ponovo potvrđena na Forumu EU-Zapadni Balkan održanom u Luksemburgu, donesu važne odluke u predstojećim mjesecima. To bi održalo zamah proširenja, dalo dodatan podstrek regionalnoj saradnji i čak stvorilo okruženje pogodno za rješavanje nekih od preostalih bilateralnih pitanja.

Po mom mišljenju, RCC je radeći blisko sa predsjedavajućim SEECP-a, svojim članicama iz regiona i šire, institucijama EU i drugim međunarodnim partnerima, pružio dodanu vrijednost ovim pozitivnim trendovima.

Uspješna saradnja između predsjedništva SEECP-a i RCC-a je dodatno ojačana. Praksa održavanja redovnih Koordinacionih sastanaka Trojke SEECP-a sa Sekretarijatom RCC-a, uz učešće institucija EU, pokazala se kao veoma uspješan instrument za pružanje smjernica i poboljšanje cjelokupne koordinacije. Fokusirajući se na predviđene aktivnosti u kontekstu realizacije prioriteta predsjedništva SEECP-a kao što je to bio slučaj sa sadašnjim crnogorskim predsjedavanjem i Strategijom i programom rada RCC-a za period 2011-2013. godina, postigli smo značajan nivo sinergije i naša je namjera da, s tim u vezi, nastavimo u istom smjeru. Već smo održali konsultacije sa visokim zvaničnicima Republike Srbije kako bismo razgovarali o koordinaciji aktivnosti oba foruma tokom predstojećeg srbijanskog predsjedavanja SEECP-om.

Zemlje iz regiona su predočile sve više dokaza dubokog razumijevanja koristi koje se mogu pobrati od kontinuirane, sveuključujuće regionalne saradnje. RCC je i dalje u potpunosti posvećen principu sveuključenosti i odlučan je da nastavi sa dobrim radom svojih ureda, pri tom podržavajući dijalog između Beograda i Prištine kojeg omogućuje EU i ocijenjujući početne rezultate.

RCC je u brojnim drugim slučajevima uspio da nađe način da pruži pragmatična i fleksibilna rješenja u cilju očuvanja duha saradnje i služenja najboljim dugoročnim interesima svojih članica iz regiona.

Sa usvojenom Strategijom i programom rada za 2011-2013. godinu, uspješno smo krenuli jednim razrađenim i projektima okrenutim putem, gdje će istrajan rad na regionalnom oporavku i razvojnim projektima u svim prioritetnim područjima konačno dovesti do ponovnog profiliranja našeg regiona kroz dovođenje evropskih standarda u svaki segment ekonomskog, društvenog i kulturnog života.

Iako su u mom Godišnjem izvještaju detaljno nabrojani rezultati rada Sekretarijata RCC-a na provođenju Strategije i programa rada za period 2011-2013. godina, ipak bih želio naglasiti nekoliko najvažnijih dostignuća i naše planove vezane za njihov nastavak.

Ako se osvrnemo na nekoliko posljednjih godina, ekonomije našeg regiona su prošle kroz veoma težak period. Uprkos nekim ohrabrujućim znacima u pogledu oporavka, poteškoće su i dalje prisutne. RCC je prepoznao potencijal Strategije EU *Evropa 2020* za artikuliranje nove regionalne vizije ekonomskom i društvenog razvoja Jugoistočne Evrope.

Vjerujemo da bi ova Strategija mogla pružiti novu sveobuhvatnu platformu za ekonomski i društveni napredak našeg regiona čak i u kontekstu politike proširenja EU. Osim toga, Strategija pruža RCC-u značajan instrument za nastavak procesa povećanja efikasnosti regionalnih radnih grupa i inicijativa, kako bi se došlo do jedne mreže onih koje će biti povezane sa RCC-om.

Strateška uloga RCC-a se pokazala u oblasti pravosuđa i unutrašnjih poslova kroz *Regionalni strateški dokument i akcioni plan* za pravosuđe i unutrašnje poslove za period 2011-2013. godina, sa osvrtnom na borbu protiv organiziranog kriminala i korupcije.

Također smo osigurali blisku koordinaciju između struktura za provođenje zakona, pravosudnih, obavještajnih i sigurnosnih struktura.

U oblasti energetike i infrastrukture, Sekretarijat RCC-a je nastavio sa promocijom razvoja održive energije u regionu kao ključne pretpostavke koncepta „zelene ekonomije“ kroz pružanje podrške provedbi Regionalne inicijative za razvoj održive energije (SEDRI), koju su zajednički pokrenuli RCC i CEI.

Doprinos Sekretarijata RCC-a pripremi Strategije EU za dunavsku regiju (EU SDR) eksplicitno je prepoznat ovim dokumentom i SEDRI je citirana kao primjer projekta u akcionom planu Strategije.

U oblasti transporta, naše napore smo usredsredili na vazdušni saobraćaj i cestovnu sigurnost. Podržali smo i omogućili usvajanje i provedbu propisa Jedinstvenog evropskog neba. Radili smo u skladu sa direktivama i regulativom EU u cilju povećanja kapaciteta državnih administracija da se efikasnije nose sa ključnim pitanjima cestovne sigurnosti.

Imajući u vidu potrebu regiona da okupi resurse za velike međudržavne projekte, RCC posebnu pažnju pridaje sektoru transporta. Regionalna infrastruktura, kao jedan od osnovnih preduslova za održiv ekonomski razvoj generalno, je u lošem stanju. Nedavna studija Svjetske banke o željeznicama u JIE jasno ukazuje na napore koje treba uložiti u razvoj jednog regionalnog pristupa u ovoj oblasti. U pogledu određivanja prioriternih ciljeva regionalne infrastrukture i stvaranja uslova za njihovu praktičnu realizaciju, bit će veoma važno da se dobije odgovarajuća politička podrška. Cijenio bih kada bi konkretno ovo pitanje postalo vodeći projekat regiona u predstojećem periodu.

U oblasti sigurnosti, Sekretarijat RCC-a je pokrenuo nekoliko aktivnosti. Najvažnija, koja označava prekretnicu u sigurnosnoj saradnji, bila je prva konferencija Foruma šefova državnih sigurnosnih službi JIE.

U oblasti izgradnje ljudskih potencijala, aktivno smo podržali provedbu projekta „Izgradnja kapaciteta za strukturalnu reformu u visokom obrazovanju u zemaljama Zapadnog Balkana“ i Radnu grupu za kulturu i društvo koja je sa radom počela prije sedmicu dana na Cetinju.

Na polju parlamentarne saradnje također nije bilo mirovanja, naprotiv. U oblasti medijske saradnje od presudne je važnosti da do sada već imamo formirano Udruženje javnih servisa.

Dame i gospodo,

Dozvolite mi da u zaključku još jednom naglasim da je tokom proteklih nekoliko godina regionalna saradnja u Jugoistočnoj Evropi još više napredovala na polju njene konsolidacije. Okvir koji je stvoren sinergijom između SEECP-a i RCC-a ostaje od presudnog značaja za krajnji cilj regiona da dostigne mir i stabilnost, ekonomski prosperitet i punu integraciju u evropske i evro-atlantske strukture.

RCC cijeni plodan i iskren dijalog koji je uspostavio sa članicama RCC-a i različitim zainteresiranim stranama. Snažno smo opredijeljeni da i dalje intenziviramo ovu saradnju s ciljem dobijanja Vaših dragocijenih ideja i preporuka. Radeći zajedno možemo dati značajan doprinos prevođenju cjelokupnih pozitivnih regionalnih trendova u održiv i sveobuhvatan proces i utvrditi konkretne razvojne projekte kako bi se zadovoljile ekonomske i socijalne potrebe regiona. Nesumnjivo je da će to i pozitivno odrediti sposobnost RCC-a da osigura kontinuiran napredak u realizaciji Strategije i programa rada RCC-a za 2011-2013. godinu.

Sekretarijat RCC-a će nastaviti da ulaže sve svoje napore u postizanje opipljivijih rezultata i dodane vrijednosti u realizaciji aktivnosti u okviru svojih prioritetnih oblasti.

U ime Sekretarijata RCC-a i u moje lično ime, želio bih prenijeti zahvalnost Crnoj Gori kao predsjedavajućoj SEECP-om i svim članicama RCC-a, naročito onima iz regiona, na sve većoj spremnosti da se RCC na najbolji način iskoristi, a na korist država i regiona. Siguran sam da će se produktivan rad nastaviti i tokom srbijanskog predsjedavanja.

Želim se zahvaliti EU i njenim institucijama, naročito Evropskoj komisiji, za stalnu podršku našem radu uz želju da se ova saradnja dodatno intenzivira i da aktivnosti RCC-a još i više doprinesu uspješnom provođenju politike proširenja EU.

Hvala.